

## AUTORSKE NOVINE

oktobar/listopad 2015.

### SADRŽAJ:

- Zakazana sjednica Skupštine AMUS-a
- Upravni odbor odobrio avansnu isplatu za 2015
- Prijem za AMUS u Predsjedništvu BiH
- Repertoar AMUS-a broji preko 20.000 autorskih djela domaćih autora
- Ustavni sud BiH odbio zahtjev za ocjenu zakonitosti čl. 4,5 i 6 Zakona o kolektivnom ostvarivanju autorskog i srodnih prava
- Generalna skupština CISAC-a produžila članstvo AMUS-u do 2017.g.

### Zakazana sjednica Skupštine AMUS-a

Predsjednik Skupštine AMUS-a g. Dervišhalidović zakazao je Skupštinu Udruženja za 29.10.2015. u 18h u Centru za mlade na Grbavici (bivši Dom Vaso Pelagić) na Grbavici. U skladu sa Statutom svi članovi su obavješteni o zakazivanju sjednice 15 dana ranije a redovnim članovima tj. članovima Skupštine Udruženja dostavljeni su materijali za rad (Nacrt Statuta, Godišnji izvještaj za 2014, Plan i program rada 2015/2016.) u elektronskoj formi. Takođe, objavljen je poziv u sredstvima javnog informisanja o vremenu i mjestu održavanja Skupštine kao i predloženi dnevni red u skladu sa Statutom.



ASOCIJACIJA KOMPOZITORA  
MUZIČKIH STVARALACA  
АСОЦИЈАЦИЈА КОМПОЗИТОРА  
МУЗИЧКИХ СТВАРАЛАЦА  
ASOCIJACIJA SKLADATELJA  
GLAZBENIH STVARALACA

## POZIV


### ČLANOVIMA UDRUŽENJA AMUS

Na osnovu člana 25. Statuta Asocijacije kompozitora - muzičkih stvaralaca AMUS sazivam sjednicu Skupštine Udruženja koja će se održati u četvrtak, 29.10.2015. u 18h u Svečanoj sali Međunarodnog centra za mlade na Grbavici (bivši Dom kulture Vaso Pelagić)  
Ul. Kemala Kapetanovića 17, Sarajevo

### DNEVNI RED SKUPŠTINE

1. Usvajanje dnevnog reda, imenovanje zapisničara i dva ovjerivača
2. Razmatranje i usvajanje Godišnjeg izvještaja za 2014. u skladu sa čl. 20 ZKOASP
3. Razmatranje i usvajanje Plana i programa rada 2015/2016
4. Razmatranje i usvajanje nacrtu Statuta Udruženja
5. Odnos Instituta za intelektualno vlasništvo BiH prema AMUS-u
6. Razno



  
Predsjednik Skupštine AMUS-a  
Dino Dervišhalidović

## Upravni odbor odobrio avansnu isplatu za 2015

Odlukom Upravnog odbora odobrena je pojedinačna avansna isplata sredstava članovima AMUS-a iz sredstava naplaćenih u 2015.godini. Avansna isplata je moguća u iznosu od **30% od iznosa** koji je autor – član AMUS-a ostvario na ime tantijema u isplati za 2014. godinu (isplata koja je realizovana u junu 2015.godine).

Autori koji se odluče da traže avansnu isplatu će ispuniti Zahtjev i dostaviti ga lično ili putem pošte na adresu: AMUS, Obala Kulina bana 22, 71000 Sarajevo sa naznakom: ZA AVANSNU ISPLATU.



Iznosi koji budu isplaćeni na zahtjev članova Udruženja će biti odbijeni od iznosa koji autor ostvari u slijedećoj isplati tantijema. Avansna isplata je uobičajena u većini kolektivnih organizacija i pokazuje stepen stabilizacije i napretka najmlađe kolektivne organizacije u Evropi. Namjera avansnih isplata je da autorima – članovima omoguće brži pristup novčanim sredstvima za zadovoljenje njihovih potreba.

*Za više informacija kontaktirajte nas na: [strucnaslužba@amus.ba](mailto:strucnaslužba@amus.ba)*

## Prijem za AMUS u Predsjedništvu BiH

Predsjedavajući Predsjedništva BiH dr.Dragan Čović primio je člana Upravnog odbora AMUS-a Davora Sučića i generalnog direktora Stručne službe Mirzu Hajrića. Predsjednik Čović je čestitao na uspjesima koje je AMUS ostvario u posljednje dvije godine i dao podršku našem radu. Predstavnici AMUS-a su informirali predsjednika Čovića o problemima koje imamo u komunikaciji sa nadležnim bh. institucijama i koji sprječavaju još brži rast i razvoj Udruženja. Osvrćući se na probleme koje imamo sa Ministarstvom pravde BiH i Institutom za intelektualno vlasništvo BiH je ponudio pomoć u rješavanju tih pitanja.

Složili smo se da ćemo nastaviti razgovor, kada će se sa novim rukovodstvima u ovim državnim organima steknu uslovi za rješavanje otvorenih pitanja.

U nastavku sastanka član UO Davor Sučić je predsjedniku Čoviću iznio više detalja o dugoročnim i sistematskim rješenjima vezanim za promjene zakona te naveo niz primjera neprimjenjivanja Zakona od vitalne važnosti za naše članove.



### **Repertoar AMUS-a broji preko 20.000 autorskih djela domaćih autora**

Sa zadovoljstvom obavještavamo članove da repertoar arhiva i baza AMUS-a sadrži preko 20 hiljada prijavljenih autorskih djela domaćih autora. Uzimajući u obzir relativno kratak period rada Udruženja ovo je podatak koji pokazuje znatan napredak u odnosu prema radu i zaštiti autorskih djela, autora članova AMUS-a. Radi uporedbe, u momentu dobijanja licence u junu 2012.godine, AMUS je brojio 241 članova i repertoar od 4.645 autorskih muzičkih djela.



U to ime zahvaljujemo članstvu na uložnim naporima u prijavljivanju djela. Ujedno, pozivamo ostale članove koji još nisu ispunili obavezu prijavljivanja svih djela kojih su autori da to učine. Nadamo se da smo unosom djela u dokumentaciju Udruženja i obradom opravdali vaše povjerenje. AMUS obavlja djelatnost ostvarivanja i zaštite autorskih prava za preko 650 svojih članova i preko 4 miliona inostranih članova. Potpisivanjem recipročnih ugovora sa preko 10 inostranih

organizacija za zaštitu autorskih prava u kratkom periodu, preuzeli smo zaštitu za veliki dio repertoara stranih autora koji se nalaze u svjetskoj bazi djela koja broji preko 6 miliona radova.

## **Ustavni sud BiH odbio zahtjev za ocjenu zakonitosti čl. 4,5 i 6 Zakona o kolektivnom ostvarivanju autorskog i srodnih prava**

Sarajevo - Ustavni sud BiH je odbio zahtjev 38 poslanika Narodne skupštine Republike Srpske za ocjenu ustavnosti odredaba Zakona o kolektivnom ostvarivanju autorskog i srodnih prava, jer je utvrdio da su te odredbe u skladu sa Ustavom.

Odbačen je zahtjev poslanika za ocjenu zakonitosti članova Zakona o kolektivnom ostvarivanju autorskog i srodnih prava u odnosu na Zakon o autorskom i srodnim pravima i član 10 Zakona o obligacionim odnosima zbog nenadležnosti za odlučivanje, saopšteno je iz Ustavnog suda BiH.



Registar Ustavnog suda BiH Zvonko Mijan izjavio je Srni da poslanici u Narodnoj skupštini Republike Srpske smatraju da određena rješenja u Zakonu krše prava na imovinu i da su suprotna zabrani diskriminacije.

"Suština je da je riječ o kolektivnom ostvarivanju zaštite autorskih prava, a a oni smatraju da bi autori to pravo trebalo da ostvaruju pojedinačno", pojasnio je Mijan.

Kako je kolektivno ostvarivanje autorskih prava standard u razvijenom svijetu, tako je zahtjev poslanika NSRS, u stvari, bio uperen protiv samih autora koji svoja prava nisu u stanju da ostvaruju individualno.

„Potvrđivanjem ustavnosti i zakonitosti odredaba Zakona o kolektivnom ostvarivanju autorskog i srodnih prava BiH od strane Ustavnog suda BiH, vjerujem da je stavljena tačka na pokušaj politizacije ostvarivanja prava, odnosno manipulacije članovima NSRS od strane lokalnih estradnih menadžera protiv kojih je AMUS, zbog izbjegavanja obaveza za koncerte, pokrenuo krivične prijave i sudske procese za naknadu štete“ izjavio je generalni direktor Stručne službe Mirza Hajrić.

**Generalna skupština CISAC-a produžila članstvo AMUS-u do 2017.g.**

Na Skupštini Međunarodne konfederacije društava autora i kompozitora CISAC, između ostalih pitanja, razmatran je i status članstva udruženja AMUS u ovoj svjetskoj organizaciji autora.



SERVING AUTHORS WORLDWIDE  
AU SERVICE DES AUTEURS DANS LE MONDE  
AL SERVICIO DE LOS AUTORES EN EL MUNDO

Na osnovu dosadašnjeg aktivnog učešća u radu tjela CISAC-a, dostavljene dokumentacije i potvrđenih aktivnosti i rezultata na polju ostvarivanja autorskog prava u Bosni i Hercegovini, Generalna skupština CISAC-a je potvrdila produženje članstva AMUS-a u CISAC-u.

U pismu koje je generalni direktor CISAC-a Gadi ORON uputio generalnom direktoru AMUS Stručne službe kaže se da je Odbor direktora preporučio Generalnoj skupštini produženje statusa pridruženog člana CISAC-a na period od dvije godine. Tu je preporuku Skupština usvojila. Nakon tog perioda očekuje se da će AMUS biti primljen u punopravno članstvo ove svjetske organizacije autora, čime se stiče pravo glasanja ali i povećava obavezna članarina, te shodno tom statutu i brojne druge obaveze. U toku tog dvogodišnjeg perioda, kaže se dalje u pismu, Sekretarijat CISAC-a će pomoći u daljem razvoju našeg društva u okviru regionalne strategije CISAC-a.